

# Arrest de la Court de

Parlement, par lequel est enioinct  
à toutes personnes, soient Eccle-  
siastiques, Gentilz-hommes : où  
autres, possedans lieux & maisons  
fortes, de y mettre Capitaines &  
Soldats, (de la Religion Catholi-  
que, Apostolique & Romaine,) en  
nombre suffisant, pour la garde  
d'icelles.



De l'Imprimerie de Guillaume de Nyuerd,  
Imprimeur ordinaire du Roy, & Libraire à Pa-  
ris, tenant sa Boutique en la Court du Palais.

*Avec privilege dudit Seigneur.*



# EXTRACT

*du privilege.*

**P**AR Lettres patentes du Roy, données à Orléans le xxij. Nouembre, 1568. Signées par le Roy, ROBERT. Et scellées du grand scel du dict Seigneur, en cire iaune, sur simple queue. Autres Lettres de Iussion données à Ioinuille le premier iour de Feurier 1569. Signées CHARLES, Et plus bas, Par le Roy, ROBERT. Et scellées comme dessus: Verifiées en la Court de Parlement, à Paris, le vij. iour de May, audict An. Il est permis à Guillaume de Nyuerd, son Imprimeur ordinaire, d'imprimer & exposer en-vente toutes Ordonnances, Edicts, Mandemens, & toutes autres choses qu'il plaira à sa Majesté faire publier, & autres publications qui seront faictes par ledict Seigneur, tant en ses Courts de parlement, que autres Courts & Iurisdiccions. Et faict inhibitions & defences, sadicte Majesté, à tous Imprimeurs, Libraires & autres, d'imprimer, faire imprimer, n'exposer en-vente ce qui aura esté imprimé par ledict de Nyuerd; sondict Imprimeur ordinaires, ny pocher, tailler & contrefaire nulles de ses hystoires, Sur les peines y contenues.



## Extraict des Registres de Parlement.

**S** V R L A  
requeste faicte par  
le Procureur gene-  
ral du Roy, tendant  
à-ce qu'il soit en-  
ioinct à toutes personnes ayans &  
possedans Places, & Maisons fortes,  
de commettre gens pour la garde  
d'icelles. (afin qu'elles ne soient sur-  
prinſes par les rebelles.) Et où ils ne  
obeirōt, qu'il soit enioinct aux Bail-  
lifz, Seneschaux, Gouverneurs, &  
Iuges Royaux plus prochains desdi-  
ctes Places fortes, d'y pourueoir &  
commettre gens & Soldats de la Re-



ligion Catholique, Apostolique & Romaine, de sorte qu'il n'en puisse aduenir inconuenient.

LA COURT, en enterinant ladicte requeste, à ordonné & ordonne, que commandement sera faict à toutes personnes, soient Ecclesiastiques, Gentilz-hommes, où autres de quelque qualité & condition qu'ils soient, de la Religion Catholique, Apostolique & Romaine, ayans & possédans lieux & Maisons fortes, en & au dedans de-ce Ressort, de mettre Capitaines & Soldats en icelles de ladicte Religion, en nombre suffisant, pour la garde d'icelles, Et empêcher que lesdictes places ne soient sur-prinſes, (par les rebelles & ennemis du Roy,) Et-ce dedás trois iours apres la publication du present Arrest, Autrement, à faulte d'auoir ce-faict dedans ledict temps, en seroit mis à leurs despens par les Gouverneurs

neurs, Baillifz, Seneschaux, où Iuges Royaux des Villes plus prochaines desdictes Places.

ET quant à-ceux qui sont notoirement diffamez d'estre de la pretendüe Religion nouvelle, tenans & possedans Maisons & Places fortes.

A ENIOINCT & enioinct ladicte Court aus-dictz Gouverneurs, Baillifz, Seneschaux, & Iuges Royaux, d'y commettre incontinent & en toute diligence, Capitaines & Soldats, en nombre suffisant, de la Religion Catholique, Apostolique & Romaine: aux despens des propriétaires & possesseurs desdictes places: Et faire en sorte qu'elles soient asseurées pour le Roy, & qu'il n'en puisse aduenir inconuenient. Et ausdictz Capitaines & Soldats qui seront commis esdictes places, de se contenir modestement, & se contenter de leurs salaires qui leurs seront

ordonnez: Sans faire aucunes demolitions & degastz, (esdictes places) ny mal & desplaisir aux propriétaires desdictes places, Ains les garder & conseruer: Ausquelz propriétaires enioinct ladite Court d'obeir à-ceux qui seront commis à la garde desdictes places.

ET OVTRE enioinct ladite Court, aux subietz desdictz Seigneurs, ayās places & maisons fortes, d'ayder à faire le Guet, (nuit & iour, esdictes places) quand il leur sera commandé & ordonné par lesdictz Seigneurs & Capitaines desdictes places: Le tout par maniere de prouision, & iusques à-ce que autrement par le Roy (où ladite Court) en ayt esté ordonné.

Faict en Parlement le dix-septième iour d'Aoust, l'an mil cinq cens soixante-neuf.

Signé

M A L O N.

*L E contenu cy dessus , à esté leu,  
crié, & publié à son de trompe & cry pu-  
blic , par les carrefours de ceste ville &  
faulx-bourgs de Paris, Par moy Pierre  
Gaudin, Sergent à verge au Chastellet,  
Preuosté, & Viconté de Paris, commis  
de Pasquier Rosignol, Crieur iuré du Roy  
nostre sire esdictz lieux, accompagné de  
trois Trompettes, commis de Michel Noi-  
ret, commis par le Roy, pour Trompette es-  
dicts lieux, Le dix-septième iour d'Aoust,  
mil cinq cens soixante-neuf.*

*Signé*

*P. GAVDIN.*



